

Ang Unang mga Magpapanaw

KATUYOAN : ° A) Sa pagpaila sa Kahulogan niining mga nagasunodsunod nga mga pagtulon-an; B) Sa pagpakita nga si Cristo lamang ang makahatag sa pasaylo sa sala.

Karon magasugod kita sa pagpanaw. Atong isipon nga kita mga lumalanyaw nga nagapanaw niining mataas kaayo nga dalan, *ANG DALAN SA KINABUHI*. Dalan kini nga nagasugod sa *Tanaman sa Eden* diin ang kinabuhi sa tawo nagasugod niining kalibutana ug matapus kini diha sa *GINGHARIAN sa Dios* nga pagatukoron diri sa kalibutan.

Kanunay ng nanginahanglan ug mapa o basahon sa paggiya kadtong nagapanaw aron maoy magagiya kaniya. Ang Dios naghatag kanato sa Iyang Pulong, *Ang Biblia*, sa mao nga katuyoan. (Salmo 119:105; 48:14) Ato kini nga gikinahanglan ug pagagamiton nato sa tibook nga panaw.

Atong ihinagbo ang daghan kaayo nga magpapanaw samtang magapadayon kita sa pagbaktas sa *DALAN SA KINABUHI*. Atong makita nga ang uban nagapanaw sa ila nga kaugalingon nga dalan apan ang tanan magapanaw gayud hangtud moabut ang paghukom. Ang Biblia nagatudlo kanato: "Adunay usa ka dalan nga daw matarung alang sa usa ka tawo; apan ang katapusan niana mao ang mga dalan sa kamatayon." (Proverbio 14:12) Ang tanan nga nagapanaw niining mataas nga dalan kinahanglan magapili kon asa sila nga dalan mosubay.

Kadtong magapanaw kinahanglan usab masayud sa mga balaod sa dalan. Atong makaplagan nga ang mga balaod sa Dios lahi sa uban nga mga panahon ug sa uban usab nga mga dapit kay sa uban nga mga panahon ug sa uban nga mga dapit. Ang mga balaod niining panahona lahi sa mga balaod nga gihatag sa panahon ni *Adam* ug ni *Eva*, ang unang mga tawo. Ang pagkamasinugtanon sa mga balaod sa *DALAN SA KINABUHI* nagakahulogan sa kalainan sa kinabuhi ug kamatayon.

Ang panahon diin nga kita karon nailalum girepresentahan dinhi sa *Landiganan sa Grasya* ug samtang magapadayon kita sa pagpanaw, imong mahibaloan kon ngano nga gitawag kini nga *Landiganan sa Grasya*.

Atong balikon ang panahon sa miagi nga unom ka libo ka tuig (6000 years) ug diha kita magsugod sa atong pagpanaw, didto sa matahum nga *Tanaman sa Eden*. Makita nato diin silang Adam ug Eva kon atong tan-awon ang atong giya nga mao ang Biblia, atong mabasa kon unsa ang nahitabo sa una nga mga magpapanaw sa *DALAN SA KINABUHI*. Gihatagan sila ug mga linain nga balaod. Basaha ang Genesis 2:15-17. Dili sila makakaon sa bunga sa usa ka kahoy nga gitawag *Ang Kahoy sa pag-ila sa maayo ug dautan*.

Ang tanan lonlon mga maayo hangtud nga usa ka adlaw niana ang maninintal: ang kaaway sa Dios ug sa tawo, miadto sa tanaman. Iyang gituis ang mga gipamulong sa Dios, namakak siya ug si Eva mitoo kaniya kay sa Dios. Si Eva milantaw, mikuha, ug mikaon sa

bunga sa kahoy ug minghatag ngadto kang Adam sa pakigkaon uban kaniya. Dayon ang ilang mga mata nangabuka aron sa pagsaksi sa sala. Ilang nakita ang ilang kaugalingon nga mga sad-an ug hubo atubangan sa Dios ug sila mibati ug hilabihan nga kahadlok. Ilang gipili ang dalan sa kamatayon. "Ang bayad sa sala mao ang kamatayon." (Roma 6:23) Ang kamatayon nagkahulogan ug pakigbulag sa Dios, dili lamang niini nga kinabuhi kondili hangtud sa kahangturan. Ilang gisulayan pagtabon ang ilang kahubo pinaagi sa buhat sa ilang mga kamot. Nanagatahi sila ug mga dahan sa palongpong aron ilang himoon nga tapis.

Samtang sila naninguha sa pagtago gikan sa Dios diha sa mga kakahoyan, ang Dios miabut nga nag-pangita kanila. Nangita Siya tungod kay gihigugma Niya sila ug gikinahanglan pagasilotan ang ilang mga sala. Iyang gitunglo ang serpente, ang lalake, ang babaye ug ang kalibutan. Unsa man kining mga tungloha? Basaha sa inyong Biblia sa Genesis 3:14-19 aron atong mahibaloon kon unsa ang hukom sa Dios nga gipakanaug sa tawo. Gibuhat kini sa Dios alang sa *kaayohan ni Adam*.

Bisan sila tinunglo, ang Dios sa grasya, gugma ug kalooy, naghatag usab ug saad nga moabut ang adlaw nga adunay Bantugan nga Mananaug nga mobuntog sa sala ug kamatayon ug magasamad sa ulo sa serpente. (Genesis 3:15) Sa 1 Corinto 15: 45, 47. Kining Bantugan nga Mananaug gitawag ug 'ang katapusan nga Adam.' Siya ang Ginoong Jesu-Cristo nga pinaagi sa iyang kamatayon sa *Krus sa Kalbaryo* iyang gibuntog ang sala ug kamatayon ug gipildi ang kaaway.

Dayon ang Dios nagpatay ug mananap, ang dugo giula, ug ang innocente nga mananap gamatay ug ang panit gihatag ngadto kang Adam ug Eva aron itabon sa ilang kaulawan ug pagkahubo. Ang Dios lamang ang makahatag sa mao nga pagtabon. Kini mao ang pagtabon sa ilang sala ug nahimo nga landong nga nagalantaw sa kamatayon sa atong Ginoong Jesu-Cristo dili lamang kay nagtabon sa sala sa tawo kondili nagakuha niini diha sa atong agianan pinaagi sa iyang kamatayon sa krus.

Ang kasaysayan sa unang mga magpapanaw maoy kasaysayan sa unang makasasala. Ang sala misulod pinaagi kang Adam ug ang tanang mga tawo niining kalibutana natowo nga makasasala ug nanagpakasala. Sila nga tanan pulos nanagsunod sa ilang pangulo. (Roma 5:12-14) *Ang bayad sa sala mao ang kamatayon.* Busa ang tanan nagapadulong sa pagkamatay. Kini nagalakip bisan pa sa mga tawo nga nanagpuyc niining *Panahon sa Grasya* ingon man usab kadtong nagkinabuhi sa unang mga adlaw. "Apan ang walay bayad nga gasa sa Dios mao ang kinabuhing dayon diha kang Christo Jesus nga atong Ginoo." Ang buhat ni Adam ug Eva wala makapahimuot sa Dios ug maingon usab ang mga binuhatan sa mga tawo karon nga mga adlaw. Ingon nga ang mananap nakahatag sa pagtabon sa sala ni Adam ug Eva si Cristo usab naghatag sa pagkamatarung niadtong tanan nga motoo kaniya ingon nga *Manluluwas*.

Nabalaka ako kon asa ang imo nga gipili. Gipili ba nimo ang dalan nga *Daw matarung* apan dalan sa kamatayon o imo ba nga gidawat ang Ginoong Jesu-Cristo ingon nga imong pugtong nga Manluluwas ug anaa sa dalan nga nagahatud ngadto sa kinabuhing walay katapusan?

SAG-ULOHON: Roma 6:23. Kay ang suhol gikan sa sala mao ang kamatayon, apan ang walay bayad nga gasa gikan sa Dios mao ang kinabuhing dayon diha kang Cristo Jesus nga atong Ginoo.

PAGTULON-AN 1 - PAGATUBAGON

1. Diin man magasugod *ANG DALAN SA KINABUHI* dinhi niining kalibutana? Genesis 2:8

2. Asa man matapus *ANG DALAN SA KINABUHI* niining kalibutana? Pinadayag 21:1

3. Isulat ang Proverbio 14:12 ingon nga sinag-ulo _____

4. Unsa man ang mga balaod sa Tanaman sa Eden? Genesis 2:15-17:
 - a. _____
 - b. _____
 - c. _____
5. Unsa man nga silot ang gipahamtang sa serpente? Tubaga sa hamubo lamang. Genesis 3:14, 15. _____

6. Unsa man ang silot nga gipahamtang kang Eva? Genesis 3:16 _____

7. Unsa ang silot nga gipahamtang diha kang Adam? Genesis 3:17-19 _____

8. Isulat ang unang tagna mahitungod kang Ginoong Jesu-Cristo. Genesis 3:15 _____

9. Susama kita ni Adam ug Eva sa tulo ka paagi. Susiha ang mga versikulo ug isulat ang sumpay.
 - a. Roma 3:23 Ang tanan _____
 - b. Roma 5:12 Kitang tanan nagapadulong ngadto _____
 - c. Roma 6:23 Kitang tanan makabaton ug _____
10. Isulat ang Roma 6:23 ingon nga sinag-ulo _____
